

Lacus piscosos complures, sed maximum omnium *Lubrum*. A Mari Deucaledonio littus paullatim se castigat, & in Orientem æstivum reflexit. Ab altero littore mare Germanicum inter rupium excelsarum scopulos iter sibipandens interius in Sinum se spatiosum explicat adversus omnes tempestates Portum salutiferū, ac certum perfugium. Proxima Rosiæ extremæ Septemtrionem versus est *Navernia*, a *Navernio* amne appellata: quam *Navernia* vulgo proprietatē sermonis patrii secuti *Strathnaverniam* appellant. Eam a Meridie Rosia claudit, ab Occasu & *Situs*. Septemtrione mare Deucaledonium eam alluit, ab Oriente Cathanesiam contingit. *Sutherlandia* his omnibus ita interjecta est, ut omnibus sit finitima, atque ab aliqua regione cœli eas contingat. Nā ab Occidente *Strathnaverniam*, a Meridie & Oriente Rosiam, a Septemtrione Cathanesiam habet objectā. Cultores magis ex natura *Sutherlandia* *Situs*. regionis pascuo quam arvo dediti. Nihil in ea quod sciam, singulare, nisi quod Mōtes candidi Marmoris habet, rarum in regionibus frigidis miraculum, & prope in nullos usus comparatum, quod nondum ejus affectatrix *Montes*. *Cathanesia*. luxuria eo immigravit. *Cathanesia* ultima ad Septemtrionem Scotiæ regio est: qua in plaga ei Navernia occurrit: hæque duæ regiones Scotiæ latitudinem in frontem angustam contrahunt. In ea fronte tria attolluntur promontoria. Altissimum in Navernia, quod Ptolemæo est *Orcas*, sive *Tarvedrum*, & *Tarvisum*: reliqua duo nequaquam æque sublimia in Cathanesia sunt, *Vervedrum*, nunc *Hoia*, & *Betubium*, falso Hæctori Boëthio *Dume* appellatum, nunc *Dunis Bei* vulgo dicitur, alii *Duncans Bei* vocant. Ex hoc nomine aliquot literis exemptis vox *Dunis Bei* facta videtur. In hoc tractu Ptolemæus collocat *Cornavios*, cujus nominis adhuc vestigia quædam restant. Arcem enim Comitum Cathanesiæ vulgo *Gernico* vocant. Nam qui Ptolemæo, & exteris *Cornavii* sunt, Britannis *Kernici* fuisse videntur. Nam cum non in hoc tractu modo, sed in diversissima Insulæ parte, nempe in Cornovallia *Cornavios* ponat eosdem, qui vetustum sermonem Britannicum retinent adhuc *Kernicos* vocant. Restat nunc ut de Insulis aliquid dicamus. Recentiores Insularum omnium, quæ Scotiam *Scotiæ Insula*. velut coronant, tres fecerunt vel classes vel ordines, *Occidentales*, *Orcadas*, & *Zelandicas*. Occidentales appellantur quæ ab Hibernia pene ad Orcades in Mari Deucaledonio lateri Occidentali prætenduntur. Has alii *Hebrides*, alii *Abudas*, alii *Mavarias*, alii *Beteoricas* appellarunt. *Orcades* in mari partim Deucaledonio, partim Germanico, ad Septemtrionalem Scotiæ partem sparsæ sunt. Harum de nomine inter Scriptores veteres & recetiores satis convenit. Sed qui eas primi tenuerint, nō satis constat. Omnes Germanicæ originis eos fuisse tradunt: At è qua natione Germanorum advenerint, id non proditur. Si è sermone conjecturam faciemus, & olim & nunc quoque vetere Gothica lingua utuntur. Sunt qui Pictos eos fuisse arbitrantur, hoc maxime argumento, quod fretum eos a Cathanesia dividens, Picticum cognominatur: Pictosque ipsos generis Saxonici fuisse existimant, Claudiani carmine maxime freti: *Maduerunt Saxone fuso*

*Orcades, incaluit Pictorum sanguine Thule:* *Scotorum tumulos flevit glacialis Ierne,*

Sed quum de his supra in Britannicarum Insularum descriptione egerimus: hæc paucula sufficient, ut Scotiæ finem imponamus.